

HÁÁVDÁN
SIVNEDEM

Háávdán sivnedem tooimât pappâ kirhoost, sivnedemkappelist, pyecceiviäsu kappelist, háävdi kuvlân teikâ jáámmám ulmuu pääihist, ton miel ko suu omâ hááh suápih tast pappáin (KO 2: 22).

Jis háávdán sivnedem tábáhtuvá kirhoost, tilálâšvuodâ aalgâst puáhtá cokkiittiđ pessijâškiittâl.

Pappâ kalga savâstállâđ jáámmám ulmuu omâháigijn ovdil háávdán sivnedem. Pappâ kalga, jis máhđulâš, väldiđ uási meiddei muštobilálâšvuotân, jis omâ hááh nuuvt tuáivuh.

Ko háávdán sivneduvvoo jâmmen šoddâm páárnáš já jis jáámmám olmooš sivneduvvoo meddâlorron, kiávttoo taat myenster hiäivulijn oosijn.

Muusik valjiimist kalga väldiđ vuotân toimättäs immeelpalvâlusluándu. Muusik valjiimist västid kanttor, já tast kalga savâstállâđ táárbu miel suin.

Sivnádâssaaniid (pittä 10) puáhtá celkkiđ háävdi kuvlân.

Jis kukáh luáštoje kirhoost, tom puáhtá porgâđ ovdil saalmâ (pittä 1) teikâ sivnádâs (pittä 13) maŋa. Jis kukáh luáštoje sivnádâs aalgâst, ton oovdâst puáhtá kevttiđ saalmâ teikâ eres muusik.

Jis rokke tuálvoo miäđuštâsâst háávdán, sundee, pappâ já kanttor joteh kisto oovdâst. Miäđuštejee juávhu oovdâst puáhtá kyeddiđ miäđušriistâ. Miätuúšist puáhtá lávluđ saalmâ.

Hävdiemvyehin nuávdittuvvoo páihálâš vyehi.

I Laidiittäs

1. Salmâ

Saalmâ ovdil puáhtá leđe álgučuojâtem teikâ eres muusik.

2. Álgusivnádâs

Sivnádâs já vuárutiervättäs puáhtá lávluđ teikâ luuhâđ.

Sivnádâs

P Eeji já + Alge já Pase Jiegâ noomân.

S Aamen, aamen, aamen.

Vuárutiervättäs

P Hiärrá liävus tiigijn.

S Nuuvt še liävus sun tuu-uv jieggáin.

3. Laidiittâssäänih

Pappâ ráhtá laidiittâssaaniid jieš teikâ kiävttá čuávuvâš molsâiävtuid. Jis laidiittâssanij maŋa lii ohtásâš rippâ, toh kalgeh jodettiđ sudotubdâstâsân.

P Rähis usteveh. Pajaspajanem tuáivu čuává taan puudâ, ko lep saatâšmin NN háávdán. Pase kaastâst sun lii lobdum Kristus jämimân já pajaspaijaanmân. Kristus vuáitun tuurvâstmáin kyedđip suu Immeel kiedáid. Mij ahevuššâp suu já lyettip Immeel sääni lopádâsân: ”Kristus lii jáámmám mii peeleast, vai uážuččijm eelliđ oovtâst suin.” (1. Tess. 5:10)

TEIKÂ

P Rähis usteveh. Mii vááimu tiävdá soro já ahheev NN jäämmim tiet. Kyedđip suu Immeel kiedáid. Mij turvâstep Kristusân, jäämmim vycittei, kii iätä: ”Mun lijjim jáámmám, mut tääl mun iälám, iälám ain já avalávt. Must láá jäämmim já tuonâ väldikode čovduuh.” (Alm. 1:18)

4. Ohtásâš rippâ

Sudotubdâstâs

Sudotubdâstâs puáhtá luuhâđ oovtâ jienân. Ton puudân puáhtá luáštádâttâđ iddui oolâ. Sudotubdâstâs maŋa puáhtá leđe joskis rukkoos, moos puáhtá avžuđ ovdâmerkkân: Kuulâ meiddei joskis addâgâsânánumân.

Sudotubdâstâsah, Kirkkokietâkirje s. 27.

Tubdâstep ovdâstâd, pase Immeel,
et lep suddodâm

jurduigijn já sanijgijn, pargoigijn já kuáridemijgijn.

Mušte mii lädisvuodâstâd

já adde mijjân Jeesus Kristus tiet addâgâs,

maid lep rikkom.

TEIKÄ

Kienñâlvuodâst mun čuárvum tuu, Hiärrá.

Hiärrá, kuulâ muu jienâ.

Vákšojus tuu peeljih muu rukkoos.

Jis tun Hiärrá, anah mielâstâd suddoid,

Hiärrá, kii talle killáá?

Mut tust lii ármu, tun adelah addâgâs,

et mij iäláččijm tuu paaloost.

Tondiet, Immeel,

liččih munjin ármugâs pyerivuodâstâd.

Poosâ muu putesin rikkomušâstân

já adde jurrâmâšân addâgâs.

Tuu vuástá lam rikkom,

lam porgâm tuu táatu vuástá.

Jurgâl kejâstuvâd meddâl muu suddoin

já siho must puoh paas tavoidân.

Immeel, sivned munjin putes vááimu

já udâsmit muu, adde vievsâs jiegâ.

Sudopestim

Molsâiävtuliih sudopestimeh, Kirkkokietâkirje s. 30.

P Puohvâldálâš Immeel adelus mijjân sudoidân addâgâs já läidejus mii avalii elimân.

S Aamen.

5. Psalmâ

Puáhtá kevttiđ meiddei kirkkoive äigipuudâ miäldásijd teikâ eres psalmâid.

Psaalmâ puáhtá lávlud teikâ luuhâđ. Ton aalgâst já loopâst puáhtá lede antifoni.

Psaalmân puáhtá labdeđ Uccâ kunnee. Ton saajeest puáhtá kevttiđ salmâveerstâ 60: 8. Uccâ kunnee kuáđđoo meddâl västuääigi, 5. västuääigi pasepeeivi rääjist.

Antifoni

Hiärrá, adde sunjin ainpištee vuoŋâstâs,
avalâš čuovâ suu čyevvejus.

Job 19: 25

Psalmâ

Hiärrá lii muu keččee,
ij must lah mihheen vááijuv.

Sun tuálvu muu ruonâs kieddijd,
sun joođeet muu čaasij kuuvl,
tobbeen uážum vuoŋâdattâđ.

Sun virkosmit muu siälu,
sun joođeet muu rievttis rađe mielđ
noomâs kunnee tiet.

Veik mun jodáččim sevŋis leevist,
jiem poláččii masten paast,
tastko tun lah muu kuvlân.

Tun suojâlah muu kiedâinâđ,
jodettah keččeesobijnâđ.

Tun valmaštah munjin peevdi
vajalijdân čolmij oovdân.

Tun vuoidah muu uáivi opsâoljoin,
já muu kalkkâ lii paijeelkolgee.

Pyerivuodâđ já rähisvuodâđ pirâstiteh muu
puoh eellimpeeivijnâđ,
já mun uážum aassâđ Hiärrá visteest
peivijdân loopâ räi.

Ps. 23

TEIKÂ

Hiärrá, adde muu mušted,
et elimâm nohá,

et peivijdân lii pieijum meeri.

Išseed muu iberdid,
mon láppojeijee mun lam!

Tuše kuámmir tievâ peeivijd tun adelih munjin,
elimâm lii čolmijnâd
tego lappâdkirdee puudâš.

Tuše piegâjielâš láá ulmuuh,
aaibâs puohah.

Hiärrá, lii-uv must vala tuáivu?
Puoh lii tuu tyehin.

Kuulâ rukosân, Hiärrá,
väaldi vuástá išečuárvumân.

Ele oro peljitemmin muu čiärumân!

Ps. 39: 5–6, 8, 13

TEIKÄ

Nuuvtko kodde koškostis ocá čäciaijuu,
nuuvt mun ahevušâm tuu, Immeel.

Muu siälu kuškâluvá Immeel, ellee Immeel.

Kuás uážum puáttid temppâlân,
lavkkid Immeel muádui oovdân?

Mondiet lah šlundom, siälužâm,
mondiet lah nuuvt liävuttem?

Vyerdi Immeel! Vala uážum kijtted suu,
muu Immeel, išedeijee.

Ps. 42: 2–3, 6

TEIKÄ

Hiärrá, tun lah mii torvo
puolvâst puolvân.

Jo ovdilgo väärih šoddii,
ovdilgo eennâm já eennâmpiirâs ožžuu aalgâs, tun
lijjih.

Immeel, ääigist ááigán tun lah.
 Tun adelah ulmuid šoddâd vuot mulden já eedah:
 ”Maccâd kovjân, Aadam párnááh.”
 Tuhhát ihheed láá tunjin tego ohtâ peivi,
 tego jiävtáš peivi, lappâd moonnâm,
 mahte iijâ vahtimpuddâ.
 Mij lappup tego naver iideed puádidijn,
 tego räási, mii uániháá kukkee,
 mii vala idedist ruonijd
 mut ehidân košká já kolná meddâl.
 Máttát mijjân, mon uánihâš lii áigám,
 et uážuččijm vijses vááimu.

Ps. 90: 1–6, 12

TEIKÂ

Hiärrá iätá:
 ”Mun piäluštâm suu, tastko sun tuurvâst munjin.
 Sun tuubdâst muu noomâ, já tondiet suojalâm suu.
 Ko sun čuárvu muu, mun västidâm.
 Mun lam suu caggen pačarâsâst,
 piäluštâm suu já pajedâm vuot kunnei.
 Mun adelâm sunjin tuárvás eellimpeeivijd,
 sun piäsá uáinid, et mun išedâm suu.”

Ps. 91: 14–16

TEIKÂ

Kijte Hiärá, muu siälu,
 já puoh, mii must lii,
 kijte suu pase noomâ.
 Kijte Hiärá, muu siälu,
 ele vájaldât, maid puorijd sun lii tunjin porgâm.

Addâgâsadeleijee já läädis lii Hiärrá.

Sun lii kierdâvâš,

já suu ármu lii styeres.

Tego alme lii olluv eennâm paajaabeln,

nuuvt lii Hiärrá ármu styeres

toid, kiäh paleh sust já rähisteh suu.

Nuuvt kukken ko nuorttâ lii viestârist,

nuuvt kuhás sun sirdá mii suddoid.

Tego eeči äärmit párnáidis,

nuuvt äärmit Hiärrá

taid, kiäh paleh sust já rähisteh suu.

Ulmuu eellimäigi lii nuuvtko räási:

ko kiedi kukká sun ráasu,

já ko pieggâ jotá paijeel, ij sun innig lah

ege suu aassâmsaje suu tuubdâ.

Mut Hiärrá ármu cuápcu ääigist ááigán,

tot lii avalâš toid, kiäh paleh sust já rähisteh suu.

Ps. 103: 1–2, 8, 11–13, 15–17

TEIKÄ

Kieņņâlvuodâst mun čuárvum tuu, Hiärrá.

Hiärrá, kuulâ muu jienâ,

vákšojus tuu peeljih muu rukkoos.

Jis tun Hiärrá, anah mielâstâd suddoid,

Hiärrá, kii talle killáá?

Mut tust lii ármu, tun adelah addâgâs,

et mij iäláččijm tuu paaloost.

Mun vuárdám tuu, Hiärrá,

vuárdám tuu ubâ siälustân

já piejâm jieččân tuáivu sánásâd.

Suu ármu lii valjaa,
sun puáhtá tuu lonestid.

Ps. 130: 1–5, 7

TEIKÂ

Hiärrá, tun lah muu tutkâm,
tun tuubdah muu.

Kost ležžem-uv, kuus maaneem-uv, tun tom
tiädáh,

jo kukken uáináh áigumušâidân.

Jodâmbâ teikâ viälláám, puoh lah mittedâm,
tievâslávt tun tuubdah pargoidân.

Tun lah sivnedâm muu siskelâš mield,
iännám kuáhtust lah muu ráhtám.

Mun lam iimâš, sturrâ iimâš, já kiijtám tuu tast.
Imâšliih láá tuu tavoh, mun tiädám tom.

Mun lam uázžum háámmán uáinimettumist,
náállán tego kienñâlist eennâm vyelni,
mut tust ij lah ucemuskin táhtán lah syeleest.

Tuu čalmeh oinii muu jo idostân,
kirjásâd lii puoh čaallum.

Ovdilgo lijjim iällám oovtâgin peeivi,
lijjii puohah muu peeivih jo sivnedum.

Mon tivrâseh láágin tuu vuáváameh, Immeel,
mon styeres liigin toi loho!

Jis irâttâm taid luuhâd,
toh láá eenâb ko čunnuu jiveh.

Mun lopâttâm, mut tiädám: tun lah muin.

Ps. 139: 1–3, 13–18

[Uccâ kunnee]

Kunnee Iáčán já Aalgan
já Pase Jiegân,

tego lâi aalgâst, tääl lii já ain,
avalâšvuodâst avalâšvuotân. Amen.

Antifoni kiärdoo

6. Rukkoos

Rukkoosavžuuttâs maņa puáhtá leđe uánihis joskis rukkoos.

P Ruhâdâllup.

1. Puohvâldâlâš Immeel.

Tun lah Algaad kierdâmáin
já suu ávulii pajaspaijaanmáin
lekkâm mijjân luodâ avalii elimân.
Iššeed mii puoh váimustân turvâstid Kristusân.
Mij alestep tuu tääl já ohtii tuu lunne kirkesvuodâst.
Kuulâ mii Jeesus Kristus, mii Hiärá tiet,
kote tuin já Pase Jieggáin
iälá já haaldâš avalávt.

2. Immeel, Iäččám,

Ruokâsmit mii murâštid,
ko lii äigi murâštid já čiärrud.
Varjâl, amas mij murâšistân
jurdâččid tuše jäämmim sevŋâdvuodâ,
mut muštáččijm avalii eellim kirkesvuodâ.
Mättát mii turvâstid Algasâd Jeesusân Kristusân,
kote lii vuáittám jäämmim vääldi.
Lohdut mii
já iššeed mii kuáhtád ittáá peeivi
ruokkâdâvt já torvolâš mieláin.
Kuulâ mii Jeesus Kristus, mii Hiärá tiet.

3. Kristus, mii Pestee.

Tun tuubdah mii atâštâs,
 ko jäämmim puátá mii alda.
 Lii vaigâd luoppâd ulmust,
 kote lii lamaš nuuvt aldasâš já räähis.
 Mij oskop NN tuu haaldun.
 Adde lohđuttâs mii murrâšân.
 Kuulâ mii Jeesus Kristus,
 rähis Algaad tiet.

S Aamen.

II Säáni

7. Ráámmátluuhâm ja saahâ

Ráámmátluuhâm

Lohhoo ohtâ teikâ mottoom čuávuvvâš ráámmátteevstâin. Puáhtá kevttiđ ráámmátteevstâid meiddei kirkkoive äigipuudâ mielđ teikâ eres ráámmátteevstâid.

Lohhee almoot ráámmátpitá.

Ráámmátluuhâmân puáhtá labdeđ vástádâs (psalmâ, salmâ, laavlâ, čuojânâsmuusik teikâ joskis smietâdem.)

Särnideijee 3: 1–8

Puohâst lii meriääigis,
 ääigis jyehi ääšist alme vyelni.
 Äigi lii šoddâd
 já äigi jäämmid,
 äigi lii ištâdid
 já äigi kiškod enâmist,
 äigi sormedid
 já äigi pyeredid,
 äigi lii kiškod pittán

já äigi huksid,
 äigi čiärrud
 já äigi povvâstid,
 äigi lii väidid
 já äigi tánsásáđ,
 äigi leggistâllâđ keedgijd
 já äigi taid nuurrâđ,
 äigi lii askadistid
 já äigi lede iärust,
 äigi uuccâđ
 já äigi láppid,
 äigi lii siäiludid
 já äigi leggistid meddâl,
 äigi kiškodid
 já äigi kuárrud oohtân,
 äigi orrood joskâ
 já äigi sárnuđ,
 äigi rähistid
 já äigi vajedid,
 äigi lii suádist
 já ääigis ráávhust.

Room. 8: 18, 24–27

Mun arvâlâm, et tááláá ääigi killáamušah iä lah mihheen ton
 kirkesvuodâ paaldâst, mii kalga vala almostuđ já šoddâđ mii
 uáassin. Mij lep piäluštum, tot lii vises tuáivum. Mut tuáivu,
 mon jo uáiná tievâsmittum, ij lah innig tuáivu. Kiibâ tuáivu
 taggaar, mon jo uáiná! Jis vuot tuáivup maidnii, mon ep
 uáini, mij meiddei vyerdip tom kierdâvávt.

Meid Jieggâ išseed mii, kiäh lep hiäjuh. Ephân tiede, maht
 mij kolgâččijm ruhâdâllâđ, et ruhâdâlâččijm olmânáál.

Jieggâ jieš kuittâg sárnu mii peeleeest sánittes šyehkimáin. Já sun, kote totká vááimuid, tiätä, maid Jieggâ uáivild, tastko Jieggâ sárnu Immeel táátu miel posij peeleeest.

Room. 8: 31–35, 37–39

Jis Immeel lii mii pelni, kii puáhtá lede mii vuástá? Ko sun ij šiaštám jieijâs Algegin mut adelij suu jámimân puohâi mii peeleeest, maht sun ij skenkkiiččii Algees miel mijjân puoh muide-uv? Kii puáhtá sujâttid Immeel valjim ulmuid? Immeel - mut sun kullut vanhurskesin! Kii puáhtá tuommid káduuttâsân? Kristus - mut sun lii jáámmám mii tiet, já eenâb-uv: sun lii cuvnum jámimist, sun čokkáá Immeel uálgispeln já ruhâdâl mii peeleeest! Mii puáhtá iäruuttid mii Kristus ráhisvuodâst? Toske teikâ atâštâs, váinu teikâ nelgi, pietittemesvuotâ, vaarâ teikâ miekki?

Mut puoh táin atâštâsâin mijjân addel ávuvuáitu sun, kote lii mii ráhistâm. Lam vises tast, et ij jáámmim ige cellim, iä engâleh ege jieggâvääldih, ij mihheen tááláš ige mihheen puátteid ege magarehkin vyeimih, ij olluvvuotâ ige kienñâlvuotâ, ij mihheen sivnedum pyevti iäruuttid mii Immeel ráhisvuodâst, mii lii puáttám julgâ Kristusist Jeesusist, mii Hiärást.

1. Kor.15: 17, 53–57

Jis Kristus ij lah cuvnum, tii osko lii tušše já tij lepped ain sudoidâd vääldist.

Taat láppojeijee kalga kárvuttud lappuumáttumvuotân já jámmee jámimáttumvuotân. Mut ko láppojeijee kárvudât lappuumáttumvuotân já jámmee jámimáttumvuotân, šadda tuottân čallui sääni:

- Jáámmim lii njiellum já vuáittu finnejum.

Kost lii tuu vuáittu, jäämmim?

Kost lii tuu viärju, jäämmim?

Jäämmim viärju lii suddo, já sudo vyeimin lii laahâ. Mut kijtto Imelân, kote addel mijjân vuáitu mii Hiärá, Jeesus Kristus peht!

2. Kor. 5: 1–5

Mij tiettip, et veik taat mii eennâmlâš telttakuáttán raččoo-uv, Imelist lii almeest mii várás avalâš viste, mii ij lam olmooškiedâi pargo. Tääbbin orodijnân mij šyehkip já táttup peessâđ kárvudáttâđ jieččân almalâš pihtâsân, tastko talle ko lep kárvudáttâm toos, ep pääsi pietitteemmin. Mij, kiäh vala aassâp taan kuádistân, šyehkip, ko lep atâštum. Ep halijdiččii nuoltáttâđ mut kárvudáttâđ uddâ pihtâsân, nuuvt et eellim čievâččij jieijâs siisâ tom, mii lii jämmee. Eidu taas Immeel lii valmâštâm mii, já táhádâssân sun lii adelâm mijjân Jiegâ.

1. Tess. 4: 13–18

Táttup, viiljah, et tietivetteđ tast, mii tábáhtuvá jäämmim naharân nohádeiheid, et tij epped murâštiččii tego tuoh iärráseh, kiäin ij lah tuáivu. Jis kerd Jeesus lii jáámmám já pajanâm jämimist, tego mij oskop, talle Immeel meiddei kalga Jeesus puádidijn pyehtid meddâlnohádâm ulmuid eellid oovtâst suin. Almottep tijjân, maid Hiärrá lii ettâm: Mij ellee ulmuuh, kiäh uázžup pääccid tehin tassaaš ko Hiärrá puátá, ep kiergân meddâlnohádâm ulmui oovdân. Jieš Hiärrá njiäjä almeest njunošengâl koččomčuorvim kulluudijn já Immeel paasuun škajâdijn, já vuosmustáá pajaneh toh, kiäh láá jáámmám Kristusân oskovâžžân. Mij, kiäh lep vala elimin, rottejup talle oovtâst siigijn poolvâin pajas Hiärá

oovdeld. Näävt uážžup ain lede Hiärráin. Ruokâsmittid tondiet kyeimi kuáimád tai sanijgijn.

1. Piät. 1: 3–7

Alestum liävus mii Hiärá Jeesus Kristus Immeel já Eeči! Stuorrâ lädisvuodâstis sun lii šoddâdâm mii uddâ elimân já adelâm mijjân ellee tuáivu cuvnmáin Jeesus Kristus jámimist. Sist mij uážuim äärbi, mii ij pillâšuu, ij tuolvâ, ige kuulnâ. Tot lii väridum tijjân oolmijn, já vuoimijnis Immeel varjâl tii oskoost, nuuvt et tij juksâvetted piäluštâs, mii lii valmâšin uáinid aigij loopâst. Tondiet tij áávvudvetted, veik tääl karttâvetted-uv kierdâd maangâmudusijn killáamušâin. Kolle-uv keččâluddoo tuulâst, já liihân tii osko čuuvtij tivrásub ko láppojeijee kolle. Killáamušâin tii osko olmâvuotâ tuodâštuvvoo, já tast puátá Jeesus Kristus almostuumeest alestâs, kirkesvuotâ já kunnee.

Alm. 7: 9–10, 13–17

Tastmaņa oinim stuorrâ aalmugjuávhu, nuuvt stuorrâ juávhu, et ij kihheen puáhtám tom lyeštíd. Tast lijji ulmuuh puoh enâmijn, puoh almugijn já hiäimuin, já sij sarnuu puoh kielâid. Sij čuožžuu väldičokkámsaje já Lábbá oovdâst paijaalstis vielgis pihtâseh já kiedâstis paalmu-uáksi já čuorvuu korrâ jienáin:

- Piäluštâs puáhtá mii Immeel,
sun, kote čokkáá väldičokkámsajeest,
sun já Lääbis!

Ohtâ puárrásumosijn koijáidij must: ”Kiäh taah vielgispivtâsulmuuh láá? Kost sij láá puáttám?” Mun västidim: ”Hiärrá, tun tom tiädáh.” Sun eedâi munjin:

- Taah láá peessâm stuorrâ pačarâsâst.

Sij láá posálâm pihtâsijdis
 já viälgudittám taid Lábbá voorâst.
 Tondiet sij láá Immeel väldičokkámsaje oovdâst
 já palvâleh suu suu temppâlist
 peeivij já iijâi,
 já sun, kote čokkáá väldičokkámsaajeest,
 lii levâttâm telttaas sii oolâ.
 Nelgi ij innig sii vääivid, ij koško,
 innig ij peivi sii puáldi
 ige pakkâ.
 Lääbis, kote lii väldičokkámsaje oovdâst,
 joođeet sii
 já tuálvu sii eellim čääsi käldei kuuvl,
 já Immeel sikko sii čoolmijn
 puoh konnjâlijd.

Luuk. 1: 78–79

Mii Immeel äärmit mii pyerivuodâstis:
 Olluvvuodâst puátá mii kuuvl idedâskuávsui.
 Tot čuává sevŋâdâsâst já jäämmim suoivust elleid,
 tot joođeet juolgijdân ráávhu kiäinun.

Joh. 5: 24–29

Jeesus iätä:

”Tuodâi, tuodâi: tot, kote kulá muu sääni já osko muu
 vuolgâtteijei, lii finnim avalii eellim. Sun ij tuommiittât, mut
 sun lii jo sirdâšum jâmimist elimân. Tuodâi, tuodâi: puátá
 äigi - já tot lii jo tää - kuás jáámmám ulmuuh kuleh Immeel
 Alge jienâ. Toh, kiäh tom kuleh, uázžuh eellid, tastko Eeči,
 eellim käldee, lii toohâm meiddei Algeest eellim käldee.
 Eeči lii meiddei adelâm sunjin tuommimväälđi, tastko sun lii

Ulmuu Alge. Elled imâštâl taam! Puátá äigi, kuás puohah, kiäh vuoinâsteh havdijnis, kuleh suu jienâ. Sij pajaneh havdijnis - pyere porgâm ulmuuh eellim pajaspaijaanmân, paa porgâm ulmuuh tuámu pajaspaijaanmân.”

Joh. 6: 37–40

Jeesus iätä: ”Puohah toh, kiäid Eeči munjin addel, puátih muu kuuvl, já tom, kote puátá muu kuuvl, mun jiem vyejeet meddâl. Jiemhân mun lah puáttám almeest porgâđ jieččân táátu miel mut tevidđ muu vuolgâtteijee táátu. Já muu vuolgâtteijee táattu lii, et mun jiem adde oovtâgin tain, kiäid sun lii oskom muu haaldun, šoddâđ huukán, mut majemuu peeivi cuuvnâm sii puohâid. Muu Eeči táattu, et juáhháást, kote uáiná Alge já osko sunjin, lii avalâš eellim. Majemuu peeivi mun cuuvnâm suu.”

Joh. 11: 21–26

Martta eedâi Jeesusân:

”Hiärrá, jis liččih lamaš tääbbin, viljâm ij liččii jáámmám. Mut tääl-uv tiädám, et Immeel addel tunjin puoh, maid sust áánuh.” Jeesus eedâi: ”Viljâd paijaan jämimist.” Martta västidij: ”Tiädám kale, et sun paijaan majemuu peeivi, pajas-paijaanmist.” Jeesus eedâi: ”Mun lam pajaspajanem já eellim. Kote osko munjin, uázžu eellid, veik jámáččij-uv, ige ohtâgin, kote iälá já osko munjin, kuássin jäämi.”

Joh. 14: 1–6

Jeesus iätä:

”Iälus tii váimu lah liävuttem. Oskod Imelân já oskod munjin. Muu Eeji päähist láá mangâ viste - jiemhân mudoi edáččii, et moonâm valmâštid tijjân aassâmsaje. Mun moonâm valmâštid tijjân saje mut puádám talle maassâd já

viežâm tii jieččân kuuvl, et uážuččijd orrood tobbeen, kost mun lam. Tij tietivetted kale kiäinu tohon, kuus mun moonâm.” Tyemes eedâi sunjin: ”Hiärrá, ep mij tiede, kuus tun moonah. Maht puávtáččijm tubdâd kiäinu?” Jeesus västidij: ”Mun lam luoddâ, tuotâvuotâ já eellim. Ij kihheen peesâ Eeji kuuvl mudoi ko muu peht.”

Párnáá sivneddijn

Mark. 10: 13–16

Jeesus kuuvl puáhtojii párnááh, et sun kuoskáččij sijnân. Máttááttâspárnááh nuttâlii pyehteid, mut ko Jeesus huámmášij tom, sun njunádui já eedâi sijnân: ”Tipted párnáid puáttid muu kuuvl, elled eesti sii. Sii sullâsij lii Immeel väldikodde. Tuodâi: kote ij väälidi Immeel väldikode vuástá tego pärni, sun ij tohon peesâ.” Sun vaaldij párnáid askasis, piejâi kiedâs sii oolâ já sivnedij sii.

Saahâ

Pappâ sárnu rijjâht teikâ kiävttä čuávvuvâš saavâid. Saavâst kolgâččij kiedâvuššâd čuávvuvâš fáádáid:

- soro kuáhtám
- labdasem jáámmám ulmuu eellim puddáid
- eellim láppojeijeevuotâ
- valmâštállâm jâmimân
- kristâlii tuáivu
- pajaspajanem já avalâš eellim
- kaastâ muštem
- Kristus jäämmim väälidi vyeitten

Pyereh omáhááh.

Tii lii kuáhtám soro, ko lepped monáttâm tijjân aldasii ulmuu. Lep tääl čokkânâm satáččid suu háávdán. Jurdáččep suu já suu eellim. Muštep puoh tom pyere já torvolii, maid sust já suu peht lep uážžum. Kijttevâšvuotâ já kunnijâtem tiävdá mii vááimuid.

Lep Immeel muádui oovdâst. Sun sárnu mijjân sänistis. Mij aldanep suu rukosijgijn. Kyedđip meddâlnohádâm ulmuu já tii, murâšteijee omâháid, suu haaldun. Ruhádállâp Imelist iše soro kuáhtámân já turvâstep pajaspajanâm Jeesusân Kristusân, kote lii vuáittám jäämmim.

Jäämmim kulá ulmuu uásán. Uddâ eellim šoddâm já jäämmim jotteev paldâluvâi taan maailmist. Ubâ luomakodde lii láppojeijee. Juáháš mist ferttee vyelgid tääbbin ohtii. Jäämmim lii lopâlâš já tubdâmettum, já tondiet tubdâp palo, ko jurdâččep tom. Jäämmim tuáivu taggaar ulmuu meddâl kii lii iállám mii alda. Ep pyevti innig kuullâđ suu jienâ, sárnuđ suin epke kuáhtâđ suu kejâstuv. Ep pyevti innig čäittid sunjin ráhisvuottân já huolâanemân. Jäämmim lii potkim aldemuid-uv čonnâsijd.

Jäämmim oovdâst iberdep, et mij kolgâččijm lede valmâšeh vyelgid. Immeel sääni ávžoo mii pieijâđ torvon já tuáivun Jeesusân Kristusân. Sun lii sovâttâm sudoidân jämimijnis. Immeel lii cuvnam suu jämimist já valmâštâm mijjân suu peht lappuuhánnáá eellim. Jeesus iätä: ”Mun lam pajaspajanem já eellim. Kote osko munjin, uážžu eellid, veik jáámá-uv.” (Joh. 11: 25)

TEIKÂ

Ráhis usteveh.

Lep čokkânâm satâččid tijjân aldaas ulmuu. Tubdâp, maht láppojeijeevuotâ lii uási mii elimist. Ton pieggâ possool mii paijeel. Tij, omâhááh, tubdâvetted, maht soro lii šoddâm tijjân tuottân. Lepped karttâm luoppâđ tijjân ráhis ulmust. Jäämmim lii maaccâtmettum, já ton vyeimi kievrâb ko mii. Mut Immeel väldi olá jäämmim-uv paijeel. Mij ruhádállâp suu mieliorroom sorosân já vyeimi puáttee peivijd já ubâ elimân. Suu iše puátá alda meiddei toi ulmui peht, kiäigijn uážžuvetted jyehid murrâšâđ já soorood.

Jäämmim tuodâlâšvuotâ uáinoo meiddei Ráámmát saanijn. Tobbeen mii eellim viärdáduvvo naharân, virde kulgâmân, ruávu já räasi muččâdvuotân já raševuotân. Näävt sárgoo uáinusân tot äigi, mii lii mijjân adelum já mii váldoo mist meddâl. Mii peivijd já ivviyd siskálduvvoje meiddei puoh eellim máhdulâšvuodah. Immeel lii adelâm mii kiävtun ääigi - ij tuš jieččân várás mut meiddei kyeimi kuáimán várás. Ääigi áárvu puáhtá eellid tuottân pargoost, päähist, rákkásijdân koskâvuodâst já aldemui palvâlmist. Ääigi áinookiärdásii áárvu uáinip avalâšvuodâ čuovâ vuástá. Mij kijttep Immeel puoh ton pyereest, maid NN lii adelâm mijjân jieijâs elimân.

Juáháš mist jotá ohtii jieijâs luodâ kiäčân. Immeel ávžoo mii sänistis jurdâččid meiddei jieččân jäämmim já avalâšvuodâ. Jäämmimpuudâ ep tiede, já távjá tot puátá-uv mijjân fakkist. Mast mij toollâp kiddâ, ko olmoošliih cageh láppoje já mij kolgâp luoppâd taan elimist? Imelist já suu áármust lii noonâ torvo nuuvt elimist ko jämimist-uv. Pestem Jeesus Kristus lii tobdá meiddei ulmuu uási puoh pohčâsijdiskijn. Mii sudoi sovâtteijen sun jaamij riistâst mii juáhháá peeleeest. Pajaspajanem peht sun vuoitij jäämmim väälđi. Sun tuodâšt: ”Mun lam pajaspajanem já eellim. Kote osko munjin, uážžu eellid, veik jáámá-uv.” (Joh. 11: 25) Kristus servikode peht kuullâp sääni taan rähisvuodâst já áármust. Ko oskop Jeesusân já sudoi addâgâsaddelmân, uážžup orrood torvolâš mieláin. Sun lii luoddâ jäämmim suoivuin avalii čuovân.

Ohtii puátá äigi satâččid mii-uv tääbbin meddâl. Kiäluh čyeijih mii muušton, já hävdi váldá mii askasis. Osko Kristusân lii eenâb ko maid mij tääbbin uáinip. Pajaspajanem tuáivu liäkká uáinu ton kirkesvuotân, mast ij lah puácuvuotâ, kierdâm ige jäämmim. Taam pajaspajanem Kristus servikodde vuárdá. Ohtii šadda tuottân tot tuáivu, mii lii almottum Job kirjeest näävt: ”Mun tiädám, et lonesteijem iälá. Sun iätä majemuu sääni eennâm alne.” (Job 19:25)

III Sivnedem

*8. Oskotubdâstâs

Oskotubdâstâs ciälkkoo oovtâ jienân.

S Mun oskom Imelân,
 Iäčân, Puohvâldâlâžân,
 alme já eennâm sivnedejei,

 já Jeesusân Kristusân,
 Immeel áinoo Aalgan, mii Hiärán,
 kote šohânij Pase Jiegâst,
 šoodâi nieidâ Máárjâst,
 kierdâi Pontius Pilatus ääigi,
 riistânnävleju, jaamij já hävdiidui,
 lavkkij vuálus tuonâ vâldikoodán,
 pajanij kuálmád peeivi jâmmei kooskâst,
 lavkkij pajas olmijd,
 čokkáá Immeel, Eeji, Puohvâldálii uálgispeln
 já kalga tobbeen puáttid tuommid elleid já jâmmeid,

 já Pase Jiegân,
 pase, ohtsii servikode,
 poosij ohtâvuodâ,
 sudoi addâgâsadelem,
 rummâš pajaspajanem
 já nuvâhannáá cellim.

*9. Sivnedemsäänih

Sivnedemsaaniid puáhtá celkkid häävdi kuvlân (pittä 18).

P Pajaspajanâm Jeesusân Kristusân oskon pajanep toimâttid
 NN sivnedem.

TEIKÄ

P Oskoost kulmâohtâsâš Imelân sivnedep NN (ubâ nommâ)
vyerdiđ pajaspajanem peeivi.

Servikodde čuážžu.

Pappâ leggist kulmii čunnuid kisto oolâ (čunnuin puáhtá rähtid riistâmeerhâ) já iätä:

NN (ovdânoomah),

eennâm kovjâ tun lah.

Eennâm koovjân tun maacah.

Jeesus Kristus, mii Pestee, covná tuu majemuu peeivi.

TEIKÄ

NN (ovdânoomah),

enâmist tun lah puáttám.

Enâmân tun koolgah oppeet šoddâđ.

Jeesus Kristus, mii Pestee, covná tuu majemuu peeivi.

TEIKÄ

NN (ovdânoomah),

Hiärrá adelij,

Hiärrá vaaldij.

Kijttum liävus Hiärá nommâ.

Jeesus Kristus, mii Pestee, covná tuu majemuu peeivi.

TEIKÄ

Jämnen šoddâm párnáá teikâ uccâ párnáá sivneddijn.

[NN (ovdânoomah),]

Immeel, Iäččám, lii tuu sivnedâm.

Uážuh vuoinâstid suu askeest.

Jeesus, mii Pestee, covná tuu majemuu peeivi.

10. Salmâ

Saalmâ saajeest puáhtá lede eres hiäivulâš muusik.

11. Rukkoos

Rukkoos puáhtá ráhtid meiddei rijjâht. Mioldiorrooh pyehtih väldid uási rukkoos ráhtimân.

P/O Ruhâdállup.

1. Pase Immeel. Tun adelih áinoo Algaad kierdâd riistâjäämmim mii peeleast. Suu hävdidmáin tun pasottih mii häävdi vuoinâstemsaijeen. Suu pajaspaijaanmáin tun vuoittih jäämmim já lekkih luodâ avalii elimân. Tuu kiedáid kyeddiip meddâlnohádâm rákkásân NN.

Hiärrá, mii mätki lii vala koskân, já tarbâšep vyeimi maŋgáid pargoid. Tondiet áánnup: ”Iššeed mii kavnáđ noonâ ohtâvuodâ Kristusân. Kaarbâ paloidân já sujâlâšvuottân. Tuárju já lohđut mii sorostân. Adde mijjân ääigi já vyeimi tipšod jieččân soro. Ruokâsmit mii eellid lyetittettee mieláin já šiev uámitobdoin. Iššeed, amas mij läpittid avalii ulme aargâ huoláid.

Immeel, adde mijjân pessijái ilo já pajaspajanem tuáivu. Kuulâ mii Jeesus Kristus, mii Hiärá tiet.

2. Puohváldálâš Immeel, tun jäämmim vyeittee. Tun lah adelâm ráhis Algaad Jeesus Kristus mii tiet riistânavlim várás já cuvnam suu jämimist, nuuvt et uážuččijm avalii eellim. Mij ruhâdállâp tuu: Jurgâl muáđuidâd mii piälán. Máttát mii mušted, et mist ij lah tääbbin pisovâš aassâmsaje. Oro alda taid, kiäh murâšteh já lohđut sii sii aabâšmist. Oro sii caggen já leehâ sijjân tuáivu uáinuid. Iššeed mii turvâstid ármusâd já eellid tááttud miel, nuuvt et ohtii uázžup puohâi oskováidâdgijn pajaniđ avalii elimân. Kuula mii Algaad Jeesus Kristus, mii Hiärá tiet.

3. Immeel, Iäččám. Skenkkii NN:n avalii ráávhud ráhis Algaad Jeesus Kristus peht. Adde avalii čuovâd čuovvâd sunjin. Liččih sunjin ármulâš já adde avalii eellim. Oskolâš Hiärrá já Pestee, tun lah lonestâm suu pase já tivrás vorâinâd. Tuálvu suu siisâ Immeel kirkesvuotân já posijdâd juávkun noomâd tiet. Äärmit meiddei mii já joođeet eellim pálgá alne, vâi mii mätki nohá pyereest já peessâp vanhurskáí pajaspaijaanmân. Algaad Jeesus Kristus, mii Hiärá tiet.
4. Lädis Immeel. Tun lah piästám palvâleijed NN eellim murrâšijn já taistâlmijn. Mij kijttep tuu áármust, mon lah čáittám sunjin já mijjân. Iššeed mii kevttid tuu adelem ääigi olmânáál, nuuvt et liččijm valmâšeh vyelgid tääbbin, ko tun kočoh mii. Lohdut murâšteijeid. Oro torvon killáámušâin. Adde ton peeivi puáttid, kuás luomakodde piäsá láppojeijeevuodâ uárjivuodâst Immeel párnái rijjâvuotân já kirkesvuotân. Kuulâ rukosijdân Jeesus Kristus, mii Hiärá tiet.
5. Immeel, tun lah asâttâm eellimsân raajijd. Ohtuu tun tiädáh, mii lii peivijdân meeri. Mij kijttep tuu NN elimist, mon lah tuálvum loopâ räi.

Hiärrá, tun uáináh, et aibâšem tiävdá mielâidân. Oro mii alda já suu, kiäm lah koččom meddâl. Oro lavhijdân caggen soro pálgá alne. Adde mijjân luáttámuš toos, et uázžup tust iše já vyeimi puáttee peivijd.

Pase Immeel. Ráhisvuottâd lii kievrâb ko jäämmim. Kijtto tast, et adelih Jeesus mijjân Pesten já sudoidân sovâttâssân. Iššeed mii turvâstid addâgâsânaddelmân. Adde mijjân tom ráávhu, mii mana puoh ibárdâs paajaapel. Kiddii váimuidân

sánásâd. Joodeet mii avalii eellim luodâ alne. Kuulâ rukosân Jeesus Kristus, mii Hiärá tiet.

6.

Ennuv kierdâm ulmuu sivneddijn.

Immeel, almalâš Eeči. Tun sihoh konnjâlijd meddâl jieijâd omij čoolmijn. Tun tuubdah NN eellim já puoh taid killáamušâid, maid sun lii feerim. Adde sunjin jieijâd kuvlân avalii ráávhu já vuoiñâstâs. Siho konnjâlijd meddâl suu čoolmijn. Tun tuubdah taid-uv koččâmušâid, moh iä lah uázžum vástádâs. Máttát mii pääccid puoh nodijdângijn tuu haaldun já kyeddid kyeimi kuáimán noodijd. Joodeet mii ton luodâ alne, kote tuálvu tuu kuuvl alme kirkesvuotân. Taam áánnup Algaad Jeesus Kristus, mii Hiärá tiet.

7.

Fakkist jáámmám ulmuu sivneddijn

Puohváldálâš Immeel. Lep ovdâstâd hiámâskâm epke ibbeerd, mii lii tábáhtum. Tun tuubdah atâštâsân já tiädáh, maid tarbâšep. Adde mii Pestee kierdâm, jáámmim já pajas-pajanem lede mijjân torvon, tuoivân já lohđuttâsân. Adde mijjân vyeimi NN fakkist puáttám jáámmim oovdâst. Kijttep tuu puoh tast pyereest, mon uázuum suu peht. Mij kyeddiip suu tuu kiedáid já ruhâdállâp: Oro alda omâháid sii sooroost. Adde mii kuáhtád kyeimi kuáimán tuu kuvlân almeest. Kuulâ mii ráhis Algaad, Jeesus Kristus tiet.

8.

Viehävääldi uhre sivneddijn.

Lädis Immeel. Tun uáináh tuskijdân já murrâšijdân. Oro miigijn já tipšo pohčâsân. Lohđut mii mieldioromijnâd. Adde vyeimi eellid já killád soro. Iššeed mii tuu ráhisvuotân lyettimáin vyeittid vaje já adelid addâgâs. Kijtto, et kuulah já

iberdah mii čuárvum. Mij táttup adelid puoh toske, počis tobdoid, kierdâm já ubâ elimân tuu kiedáid. Skenkkii NN:n avalii ráávhu. Adde mijjân ráávhud já eellimsân tárguttâs. Kuulâ mii ráhis Algaad, Jeesus Kristus tiet.

9.

Jiešsorme toohâm ulmuu sivneddijn.

Ármulâš Immeel. Murrâšân kienñâlvuodâst mij ruhâdállâp tuu. Oro toskestân alda mii. Tuše tun tuubdah NN eellim já jäämmim. Oskop tuu áármud suáján. Tun tiädáh, mon lussâd eellim puáhtá lede. Tun tuubdah mii siskáldâs já jurduid. Kyedi mii sorostân. Adde mijjân ráávhud, mii lii puoh ibárdâs paajaabeln. Mij turvâstep Jeesusân Kristusân, mii Pestei.

10.

Jämnen šoddâm párnáá sivneddijn.

Ármulâš Immeel. Mij ep ibbeerđ, mondiet taat uccâ páárnáš ij uázžum pääccid eellid mii koskâvuotân. Oskop kuittâg, et sun lii tuu já engâlijdâd kuvlân torvoost. Halijdep lyeštid suu iáčálâš askasâd lyettimáin Jeesus lonástâspaargon. Oro alda NN já NN (vanhimij noomah), ubâ perruu, äijih já ááhu já puohâid suu omâháid sii sooroost. Lohđut sii, ko vâdis koččâmušah tevdih sii mielâ. Adde vyeimi puáttee peivijd. Kuulâ mii Algaad Jeesus Kristus tiet.

11.

Uccâ párnáá sivneddijn.

Ármulâš Immeel. Lep ovdâstâd uccâ NN kisto paaldâst. Tun tiädáh, mon vaigâd mist lii soro, pettâšume já kuárusvuodâ tobdoi kooskâst. Oro mii alda já varjâl, amas mij šoddâd hogâttâsân tuu hilgođ. Tipšo ráhisvuodâinâd mii já povčâsteijee havijdân. Mij kijttep tuu tast, et uázuum eellid NN:áin

uánihis puudâ. Kijtto suu elimist. Kijtto ton pyereest, maid lah adelâm mijjân pohčâs já killáamuš-uv ääigi. Iššeed mii luovâttid taam párnáá tuu haaldun. Vääldi suu askasâd já tuálvu alme pááikán. Joodeet mii puohâid ohtii tohon Jeesus Kristus, ráhis Algaad tiet.

12.

Päärni sivneddijn.

Ráhis almalâš Eeči. Muurâš tiävdá váimuidân NN kisto kuvlân. Tun adelih suu mijjân, tun valdih suu jieijâd kuuvl. Kijtto tast, et uážuim toollâđ suu koskâvuodâstân suu uánihis eellimáigáá. Mij tiettip, et sun lii engâlijdâd kuvlân šiev torvoost. Máttát mii lyettid tunjin. Oro NN já NN (vanhimij noomah), ubâ perruu, äijih já ááhu já puohâi murâšteijei torvon. Adde sijjân vyeimi killáđ luis soro. Joodeet mii puohâid alme pááikán Pesten Jeesus Kristus peht.

13.

Nuorâ sivneddijn.

Immeel, ep ibbeerd, mondiet NN eellim paasij näävt uánihâžžân. Eellim láppojejeevuotâ lii orostittám mii. Soroost táttup lyettid tunjin já ruhâdállâp: oro mieldi mii aaibâšmist. Máttát mii jurdâččid, et meiddei nuorâ eellim lii oles eellim já tun adelah toos tárguttâs. Mij kijttep puoh pyereest já muččâdist, maid uážuim sust. Mij alestep tuu pase kaastâ läähjist, kijttep ármustâd, mii addel mijjân torvo já kuáddá rasta jäämmim ráäji. Taan tuáivust kyeddip suu tuu kiedáid. Mij turvâstep Jeesusân Kristusân, kote lii pajaspajanem já eellim.

14.

Puárisulmuu sivneddijn.

Lädis Immeel. Lah adelâm NN:n kuhes eellim já koččom suu meddâl ääigi vaaivijn. Adde sunjin avalii vuoïñâstâs. Mij kijttep tuu puoh ton pyereest, maid uážuim suu peht. Iššeed mii huksid elimân sáánáád toorvon já uuccâđ tom, mii lii pyeri, rievtnáál já pišteváš. Iššeed mii turvâstid ármusâđ já eellid táátud mielđ, nuuvt et ohtii peessâp tuu kuuvl já uážžup kuáhtâđ aldemuidân já tuu alme pääihist. Kuulâ mii Algaad Jeesus Kristus, mii Hiärá tiet.

15.

Puárisulmuu sivneddijn.

Immeel, Iäččám. Tun adelih NN:n kuhes eellim. Lah koččom meddâl laddâm valje. Vääldi suu jieijâđ vuoïñâstâsân. Mij kijttep tuu tast, et lah juáhám sunjin lahjijdâđ taan já puáttee eellim várás. Kijtto, et uážuim tubdâđ suin ohtâvuodâ, mii lii ulâttâm suhâpuolvâi čoodâ. Adde mii oppâđ tubdâđ tast, mii lâi suu elimist muččâđ já árvulâš. Iššeed mii oskoost já tuáivust jotteeđ luodâ, mii tuáivu avalii ráávhun já kirkesvuotân. Kijtto alme pääihist, kost suhâpuolvah uážžuh kuáhtâđ. Kuulâ mii Algaad Jeesus Kristus, mii Hiärá tiet.

S Amen.

12. Mii Eeči

Hiärá rukkoos ciälkkoo oovtâ jienân.

S Mii Eeči, kote lah oolmijn.

Pasottum liävus tuu nommâ.

Puáđus tuu vâldikodde.

Šados tuu táttu meid eennâm alne nuuvtko almeest.

Adde mijjân onnáá peeivi mii jyehipiäiválii leeibi.

Já adde mijjân mii suddoid addâgâs,
nuuvtko mij–uv addâgâs adelep toid,
kiäh láá mii vuástá rikkom.

Já ele joodeet mii kivsádâsân,
mut peesti mii paast.

Tastko tust lii vâldikodde já vyeimi já kunnee nuvâhânnáá.
Aamen.

IV Lopâttâs

13. Sivnádâs

P Hiärrá sivnedus tii já varjâlus tii.
Hiärrá čuovvâdus muáduidis tijjân
já liävus tijjân ármulâš.
Hiärrá jurgâlus muáduidis tii piälán
já adelus tijjân ráávhu.
Eeji já + Alge já Pase Jiegâ noomân.

S Aamen.

14. Loppâmuusik

Loppâmuusik puáhtá leđe salmâ já/teikâ čuojânâsmuusik.

15. Rukkoos häävdi kuvlân

Rukkoos puáhtá celkkiđ meiddei háávdán lyeštím maŋa.

P Ruhâdâllup.

1. Puohvâldâlâš Immeel, almalâš Eeči. Tun adelih
áinoo Algaad killád riistâjäämmim mii peelest.
Sun hävdiđui, já näävt tun pasottih mii-uv häävdi
vuoijâstemsaajeen. Mij ruhâdâllâp: Vaalmâšt Pase

Jiegâinâd váimuidân suu aassâmsaijeen, nuuvt et sun pisoččij mist já mij sust. Adde mii riistâ já vääivi maņa peessâd ráávhun já pajanid majemuu peeivi avalii elimân. Algaad Jeesus Kristus, mii Hiärá peht.

2. Rähis almalâš Eeči. Oskop NN tuu kiedáid. Lyeštíp suu rummâš háávdán vyerdid pajaspajanem já uddâ sivnedem iideed. Pestem jaamij já hävdiui, já näävt tun pasottih mii-uv häävdi vuoïñâstem-saijeen. Tun cuvnih suu jämimist, vuoittih jäämmim já lekkih alme oskováid.

Jeesus Kristus, mii Pestee. Tunjin mii pajedep jieččân kejâstuv. Äärmit mii já adde mijjân tuáivu, mii iälá. Tuáivu mii pajaspaijaanmân já avalii elimân.

3. Almalâš Eeči, iššeed mii mušted, et Algaad vuoïñâst häävdist. Adde mii-uv jämimân maņa vuoïñâstid torvolávt já vyerdid uddâ eellim. Väaldi mist palo meddâl já máttát mii lyettid toos, et Jeesus tiet uázžup jäämmim já häävdi peht peessâd almali völdikoddásâd. Kuulâ mii Algaad Jeesus Kristus, mii Hiärá tiet.

S Aamen.

16. Háávdán lyeštím

Kisto luáštoo háávdán. Kisto lyeštidiijn puáhtá lávlud saalmâ.

Sivnádâssäänih

Pappâ ciälkká sivnádâssaaniid, jis toh iä lah celkkum ovdil pittáást 12. Ko kukáh láá luoštum häävdi oolâ, puáhtá lávlud saalmâ.